

GARANTIERT KAI

BOARDING SPASS

PASSENGER

GSTRANDET STATT GLANDET

SITZ

SCHLEUDERSITZ



DESILLUSION

BASEL



ÄNDSTAZIOON

GATE

GEIT GAR NÖÖT

DATE

DI DATE KASCH
GRAD ABSCHRYYBE

DEPP-ARTURE

ME WEISS ES NIT

GARANTIERT KAI

BOARDING SPASS

PASSENGER

GSTRANDET STATT GLANDET

GATE

GEIT GAR NÖÖT

SITZ

SCHLEUDERSITZ



DESILLUSION

BASEL ÄNDSTAZIOON

SCHOTTEDICHTER

FASNACHT 2025



JEEDEM AARSCH SY BOMBE

Eson e Aarsch dänggt sich do nyt derby
und phaggt näben em Guurt au e Bombe y,
no kurz em Euroairport deelfooniert,
scho wird deert alles evakuiert.

Aber au daas – wie hitte fascht alles im Lääbe,
isch nadyrting fake – mir finde s dernäbe,
Folge wird s jo kaini gää,
drum loot sich kain dä Gägg lo nää.

Au miir sinn drum weder gfloooge no glandet
und im Feerienoutfit do z Basel gstrandet,
aber jetz eerscht rächt und nundefaane,
lege mir e Bombe-Goorteesch ane.

Als Wytamynbombe git s Orangsche und no vyl mee,
Sexbembli kasch uf em Waage au gnuég gsee,
guet der Aint oder Ander – kunnssch nit druss,
gseet eenter wien e Kalorriebombe uss.

Doch halt, mir gseen ain us eme Schuelhuus koo,
zmitts in de Feeerie – was macht dää denn do?
Är machi jetz e Amokdrooig efang;
was die Groosse kenne, kaa ich scho lang.

Ääne am Daich hantiert der Donald Bombastig,
per Gnopfdrugg laider au nit nur mit Blastig,
aber mir wänn s jetze nit no iberdrybe
und sprichweertig scheen uf em Boode blybe.

Doch halt! – dasch jetz kai Gspass,
s Comité wingt is ab der Gass,
au sii hänn grad e Mail bikoo,
es sig au irgendnaim e Bombe do.

Kai Angscht mir sinn guet organisiert,
zeerscht wird bis an d Burgfälder Gränze no trasiert,
bis au bim Schärz-Robi s Zwanzgerli abe gheit
und er lut «Fäälalaarm» in d Möiti schreit.

Also wyter goots mit scheene Reesli
und däne beese, beese Invasiv-Mimeesli,
bis der näggschti Aarsch e Bombe-Spässli macht,
komisch nur, dass e Kaine lacht.